



阿婆个戇孫

儕儕个鼻空斯向往下，所以惜子惜孫係天性。在俅仔成家後个空窗期，試著有滴無落無著，孫仔个到來，帶分一屋人當大个快樂，逐儕像捍卵樣，摻佢捍到正正、托到平平、保護到好好。

實在好福氣，佢這隻孫仔當好渡，食飽睡、睡飽寮，罕得噉。毋多知仔，斯會打乜咕、打燈、學行、學講話咧，續等愛去讀幼稚園哩啲。佢係一隻盡特別个細人仔，當少聽佢念童謠、唱細人仔歌，細細仔定，總係跔等厥爸看「麥克杰克遜」演唱會个片仔，學佢棚等烏目鏡、戴等帽仔，嘴緊唱、腳緊蹬，有模有樣，非常得人惜。連看个書也摻一般細人仔無共樣，專門好看摻人體結構、人體器官有關个書，尤其一支換心个錄影帶，佢一遍又一遍看到當清楚，顛倒佢看著該血汀汀个畫面，嚇斯會嚇死。

在佢讀幼稚園个時節，逐暗晡八點零斯睡目，第二日朝晨總係看佢睡飽咧精神當好，唱等歌仔去讀書，又聽佢講有同學好共下寮當快樂，佢兜聽著乜當歡喜。背尾正知，佢當晝睡毋忒，長下分先生罰企仔，又合(gag)毋知係幼稚園个課程佢試著無生趣無？毋肯恬恬坐等上課，長下分先生罵並投厥姆。佢聽著當毋盼得，厥姆也決定分佢去考提早入學，斯恁樣，佢斯提早一年去讀一年生咧。

正讀一年生个時節也識鬧兜笑話，像自然科愛試味道，先生講咬一口餅仔試看啊，佢噉做一口食淨淨，先生又好閑又好笑。上課愛人發表，佢總係第一隻擎手，一講斯半節課較加，舞到先生愛限制佢發表个時間，正有辦法好上課。毋過先生也當阿腦佢，講佢看書个量雖然無一定最多，但係質最好，選佢做班項个「閱讀小博士」。

孫仔緊來緊大緊知人我，善良个天性也看出來咧，小學畢業旅行，為著毋分先生摻同學為難，佢自願去摻別班个同學合(gab)等睡。國中時節當驚佢因為成績好、年齡細，分人霸凌，該載佢熱情、有同理心，又長下摻先生搵手指導同學，所以逐個同學都摻佢盡好。高中讀个係科學班，課業重，有個同學因為壓力大需要輔導，先生看孫仔日日笑微微仔，性情開朗、心性好，喊佢逐禮拜三留下來摻該隻同學做伴，佢也當樂意答應。孫仔無兄弟姊妹，當珍惜同學之間个感情，佢看佢長成一個愛同學、關心同學个青少年，心肝肚有淦淦个感恩。

阿婆个戇孫大哩啲，高中一年生咧。戇孫啊！十過歲个你世界還盡闊、盡大，阿婆老咧，阿婆个世界裡肚你最重要，係講阿婆个人生還有彩虹(fung)，佢甘願用佢个彩虹，換你一路个風風雨雨！

作者：張美容

☆詞彙學習☆

【阿婆个戇孫】a⁺ po gai[~] ngong[~] sun[~]：
祖母對孫子寵溺的稱呼。

【捍卵】hon⁺ lon[~]：護持著蛋。

【打乜咕】da[~] ang gu：嬰兒學說話。

【打燈】da[~] den[~]：小孩學習站立。

【棚等烏目鏡】pang[~] nen[~] vu[~] mug giang[~]：
戴著太陽眼鏡，以裝氣派。

【血汀汀】hied din[~] din[~]：血淋淋。

【睡毋忒】：shoi⁺ m ted：睡不著。

【罰企仔】：fad[~] ki[~] er：罰站。